

8. januaari 2026

Inatsisartut Suleriaasianni § 37, imm. 1 naapertorlugu tulluuttumi apeqqutit Naalakkersuisunut saqqummiuppakka.

Naalakkersuisunut apeqqutit:

- 1. Meerarsiat, angajoqqaarsiallu feriaqatigiissinnaanissaannut, sammisassanullu peqataaqatigiissinnaanissaannut massakut periarfissaasut Naalakkersuisut qanoq nalilerpaat?**
- 2. Meerarsiat feriaqatigisinnaanerinit periarfissat ullumikkut kommunimit, kommunimut assigiinngitsumik iliuuseqarfigineqartarnerat Naalakkersuisut qanoq isumaqarfigaat?**
 - a. Meerarsiat kommunimi sumiikkaluarunik feriarnissamut, misigisaqarnissamullu assigiimmik periarfissaqarnerinik qulakkeerisumik nuna tamakkerlugu ersarissunik, assigiinnillu sinaakkuteqartitsinissamik pisariaqartitsineq pillugu Naalakkersuisut qanoq isumaliuteqarpat?**
- 3. Pisortani, namminersortunilu sulisorpaaluit akiliunneqarlutik angalasinnaatitaanerat assigalugu meerarsiat, angajoqqaarsiallu feriarnissaannut aningaasanik immikkoortitsisoqassappat tamanna aningaasatigut, allaffissornikkullu pisortanut qanoq kinguneqassava?**
 - a. Meerarsiat atugarissaanerinit, attaveqarnerinit, allanngujaatsumillu atugaqarnerinit taamatut aaqqiissuteqarneq qanoq tapertaasinnaanersoq Naalakkersuisut qanoq nalilerpaat?**
 - b. Aaqqiissut kommuninit pisariitsumik, allaffissornikkullu aqunneqarsinnaasumik ilusilersorneqarnissaanut suut Naalakkersuisut periarfissaasoraat?**
- 4. Sammisamut soqutiginartunik allanik Naalakkersuisut paasissutissiisinnaappat?**

(Inatsisartunut ilaasortaq Pipaluk Olsen, Demokraatit)

Tunngavilersuut

Meeqqat atugarissaarnissaannut, ineriartornissaannut, toqqissisimanissaannullu angajoqqaarsiat akisussaaffimmik annertuumik tiguisarput. Meerarsiat attaveqarnerminnik ineriartortitsinissaannut, misigissutsikkullu toqqissisimanissaannut allanngujaatsumik atassuteqarsinnaanissamut, misigisaqatigiittarsinnaanissamut, eqqissisimanissamut aamma qanilaarnissamut periarfissaqarnissaq aalajangiisuupput. Tassunga atatillugu feriaqatigiittarneq, peqatigiillunilu sammisaqartarneq aalajangiisuusinnaapput.

Meerarsiat feriaqatigisinnaanerinit periarfissat ullumikkut kommunimit, kommunimut assigiinngitsumik iliuuseqarfigineqartarput. Assigiimmik sinaakkutinik amigaateqarneq meerarsianut, angajoqqaarsianullu toqqissisimannginnermik aamma nalorninnermik pilersitsinnaavoq, meeqqallu nuannersunik



misigisaqarnissaminnut periarfissaqarnerini meeqqap pisariaqartitai apeqquataatinneqaratik allaffissornikkut assigiinngisitsinerup apeqquataalerneranik kinguneqarluni.

Meerarsiat, angajoqqaarsiallu feriaqatigiinnissaannut periarfissaqartitsineq, meeqqap ineriartornerani qitiulluinnartunut ataatsimoornermut, attaveqarnermut, nutaanillu misilittagaqarnissamut tapertaasinnaavoq. Tassunga atatillugu paasissutissanik tunngaveqarluni aalajangiisoqarsinnaaniassammat, akiliussilluni angalatitsisarnerup naleqqataanik aningaasanik immikkoortitsilluni aaqqiissummik pilersitsinerup aningaasatigut, allaffissornikkullu kingunissaanik ersarissaassalluni pisariaqarpoq.

Massakkut sinaakkutaasunut, meerarsiallu atugarissaarnerinut aamma angajoqqaarsiat pingaarutilimmik sulinerinut tunngavissiillutik assigiissaarnerusunik, ersarinnerusunik, meeqqallu qitiutinnerullugit aaqqiissutissanik pilersitsinissamut periarfissanik Naalakkersuisut naliliinerinik paasinnissallunga kissaatigaara.

Apeqquateqaatinnut akissutit piffissaliussap ullut suliffiusut qulit iluini tigunissaat qilanaaraara.